

Sa crésia est prus arta de sa pratza gai duus metrus. In sa faciada si bint is matonis de arenària e acabbat cun unu perfilu curvilíneu, tenit unu portali mannu e in sa parti arta una fentana retangulari manna chi de pagu ant impreziosiu cun un'imbidriera. Su campanili cuadrau de su 1912 dd'ant pesau in logu de cussu béciu a vela, chi teniat fintzas un'arrelógiu públicu, e acabbat cun unu tzimbóriu otagonal. Intra is arredus prus importantis arregordaus s'altari de linna béciu (capella is féminas), sa campana de su presbitériu de su 1723, s'acuasanta a su ladu deretu de s'intrada de su séculu XVII e sa Bia Crucis moderna in ceràmica de Claudio Pulli.



Crésia de Santu Franciscu in Biddanoa de Forru



Progetu finantziau cun su dinai de sa Regione Autònoma de Sardignia cunformas a sa L. 482/99 e a sa L.R. 22/2018.

Progetu gràficu a incuru de s'Ufitziu Lìngua Sarda de Biddanoa de Forru



Sa crésia parrochiali de Biddanoa de Forru est dedicada a Santu Franciscu de Assisi. Dd'ant pesada in su séculu XVII in istili góticu aragonesu e agoa dd'ant mudada in istili barocu. In is *Rationes Decimarum* de su 1342 si atestat chi sa crésia ddoi fiat giai de su séculu XIV ma su primu testimóniu iscritu chi dda pertocat est de su 1592, candu fiat andau a dd'abbisitali s'Obispu Pietro Clemente. A printzípiu fiat un'edifítziu retangulari chentza de capellas e agoa, fortzis in sa primu perra de su Sescentus, si aciungint is tres capellas in su ladu nord e si allónghiat s'àula aciungendi su presbitériu, su coru e s'altari maggiori, chi in su 1604 est de linna pintada cun unu níciu in mesu intra duas colonnas trotoxadas innui fiat sa stàtua de Santu Franciscu.

In su 1787 si aciungit s'altari de màrmuri chi allogat però s'altari de linna in sa parti arta, agoa in su 1933 ndi ddu bogant po ddu ponni in sa Capella de s'Immaculada.



Su fonti batisimali de màrmuri est de su 1900, ma de su 1983 is batiaris si faint in su fonti prus antigu de su 1600 chi s'agatat aintru de unu níciu. Sa trona de màrmuri a prus coloris est de su 1925, e in su 1941, in mesu de sa fiancada sud est aciunta s'última capella.

